

06 NOV 2003

Negara-Mahathir

DEWAN NEGARA TERIMA USUL IKTIRAF JASA DR MAHATHIR

KUALA LUMPUR, 6 Nov (Bernama) -- Persidangan Dewan Negara hari ini sebulat suara menerima usul pengiktirafan dan penghargaan terhadap bekas Perdana Menteri Tun Dr Mahathir Mohamad.

Usul itu yang dibawa Menteri Tanah dan Pembangunan Koperasi Tan Sri Kasitah Gaddam adalah bagi merakamkan penghargaan dewan itu atas jasa yang telah disumbangkan Dr Mahathir sepanjang 22 tahun memimpin negara.

Rata-rata senator yang membahaskan usul itu berpendapat Dr Mahathir adalah pemimpin ulung dan masyarakat Malaysia terhutang budi dengan beliau.

Masing-masing juga menyatakan harapan agar bekas Perdana Menteri itu akan terus memberi sumbangan walaupun telah bersara daripada kerajaan dan parti.

Senator Datuk Hazizah Mohd Sultan semasa perbahasannya menyifatkan persaraan Dr Mahathir adalah pada ketika negara dan parti masih memerlukannya.

Bagaimanapun katanya, rakyat negara ini harus menerimanya kerana negarawan ulung sudah mengorbankan lebih dua dekad daripada hidupnya berbakti kepada masyarakat.

Senator Datuk Dayang Mahani Ahmad Raffae pula berkata, Malaysia bertuah kerana dikurniakan pemimpin yang bukan saja baik tetapi juga berwibawa dan berpandangan jauh.

Katanya di bawah kepimpinan pemimpin itu, Malaysia dibawa daripada satu kejayaan kepada satu kejayaan.

Pada masa yang sama, kesemua anggota Dewan Negara yang membahaskan usul itu menyatakan sokongan mereka terhadap Perdana Menteri kelima Datuk Seri Abdullah Ahmad Badawi.

Mereka berikrar akan memberi kerjasama erat kepada Abdullah bagi membolehkan beliau membawa Malaysia lebih jauh ke hadapan.

-- BERNAMA

NM NM BK